

四明叢書

張宗祥

西山私淑

劉樸谿先生承

劉承號樸谿爲建寧學正時得西山所編中庸大學鉅之梓惟論孟二書闕焉扣之庭聞則云已經點校但未編集先生謂讀書記中所載論孟處與今所刊中庸大學凡例同其他如文集衍義等書亦有可采摭者因彙集成書凡五閱月而帙就又五閱月而刊畢云

經義考

謝先生侯善

謝侯善序西山四書集編後云得西山手澤于夏獻之

遺亟命工刊之于郡庠 經義考

梓材謹案西山子志道爲學庸集編後序稱郡博士謝君來請甚勤且曰刊之泮宮俾家有其書人傳其學豈不公溥志道有感其言遂出授之且著其說于下方使得此書者必深思而力踐之斯爲善讀庶亦不負謝君私淑之意謝君莆之名士于斯道有聞故于學政知所先務云當卽先生

州守黃先生巖孫

黃巖孫字景傳惠安人寶祐進士授仙溪尉一以義理之學爲政先是段全淩景陽尉仙溪先生作思賢堂且記曰事俗而不自爲俗者學充于事也官卑而不自爲卑者人大其官也咸淳中知尤溪縣新南溪書院建四

齋及講堂以棲學者疏朱子太極通書西銘解三篇及其與問答語凡諸儒之說申以己意會粹成編名曰輯解尋守福州校刊真西山讀書記學者宗之

道南源委

漕舉陳古愚先生仁子

附門人李懋宣譚以則

陳仁子字同甫號古愚茶陵人咸淳十年漕試第一宋亡不仕著有牧萊脞語十二卷其門人李懋宣編二稿八卷其門人譚以則編先生嘗編文選補遺四十卷排斥蕭統蓋私淑真西山文章正宗之說者其云補文選不云竟以廢文選使兩書並行各明一義用以濟專尚

華藻之偏亦不可謂之無功云

四庫書目提要

梓材謹案一統志載其宋末薦舉不仕于元營別墅于東山博學好古云

知州方虛谷回

方回字萬里一字困甫號虛谷歙縣人穎悟過人倜儻不羈善詩文爲隨州教授呂師夔提舉江東辟充幹辦公事賈似道喪師後萬里上書數其罪有十可斬又泣言賈似道與其客廖瑩中皆當卽誅出知建德府宋亡入元累遷通議大夫致仕歸所著有碧流集桐江集讀易釋疑易中正考尙書考儀禮考皇極經世考古今考曆

象考衣裳考玉考先覺年譜名僧詩話若干卷及宋季

雜傳

歙縣志

梓材謹案虛谷知嚴州降元以爲建德路總管故每爲謝山所詆

雲濠謹案戴剡源集齊東野語序方使君詩序桐江詩集序并陽詩序紫陽方使君文集序皆爲虛谷作也

方桐江語

近世以老莊注易以六典傳尙書以三禮箋詩以司馬法釋周禮以災異讖祥說春秋以鄭衛淫聲制樂真學者之大不幸也

桐江文集

禘者推其祖之所自出之帝以其祖配之祭于廟則與郊祀天不同而郊祀后稷以配天所配者乃昊天上帝之天非有所謂感生之蒼帝也宗祀文王于明堂以配上帝所配者卽昊天上帝之帝亦非汎配青赤黃白黑之五帝也郊以天言則圜邱露祭與天相接故配之以開國之祖尊之也明堂以帝言則屋下之祭天之神若王者云者以有天下之祖配之亦尊之也曰嚴父云者以周公制禮時言之故因周公而係文王曰父雖成王

康王以下亦皆以文王配帝也其或曰成王則以武王配康王則以成王配者乃後世拘嚴父之文各私于其父而曲證互取以成此說其實非也

禘祫及感生帝說

文公成公子思無邪各爲一說前輩謂之未了公案詩三百一言以蔽之曰思無邪今皆謂作詩者思無邪文公獨不謂然論語集注謂凡詩之言善者可以感發人之善心惡者可以懲創人之逸志觀此固已爲詩之言有善有惡作詩之人不皆思無邪矣猶未也文集第七十卷讀東萊詩記乃有云孔子之稱思無邪也以爲詩

三百篇勸善懲惡雖其要歸無不出于正然未有若此之約而盡者爾非以作詩之人所思皆無邪也今攷東萊所說見桑中詩後謂詩人以無邪之思作之學者當以無邪之思讀之文公則辨之曰彼雖以有邪之思作之而我以無邪之思讀之二公之說不同如此又雅鄭二字文公謂桑中溱洧卽是鄭聲衛樂二雅乃雅也成公謂桑中溱洧亦是雅聲彼桑間濮上已放之矣予嘗詳錄二先生異說于思無邪章今魯齋但紀文公之說而不紀成公之說惟引成公讀詩記所說十有三條而

桑中詩後一條不錄無乃以文公之說爲是耶竊謂桑中溱洧非淫奔者自爲之詩彼淫奔者有此事而旁觀之人有羞惡之心故形爲歌詠以刺譏醜惡若今鄙俚如賺如令連篇累牘形容狹邪之語無所不至豈淫者自爲之乎旁觀者爲之也文公以淫奔之詩出于淫奔者之口故不惟不信小序而大序止乎禮義之言亦致疑焉蓋謂桑中溱洧等作未嘗止乎禮義也予妄意以爲採詩觀風詩亦史也鄭衛之淫風盛矣其國豈無君子與好事者察見其人情狀故從而詠歌之其所以詠

歌之蓋將以揚其惡雖近于戲狎而實亦足以爲戒也
文公以爲淫奔者自爲是詩則其人亦至不肖大無恥
矣惡人之尤也聖人何錄焉成公謂詩雅樂也祭祀朝
聘之所用也桑閒濮上之音鄭衛之樂也世俗之所用
也桑中溱洧諸篇作于周道之衰雖已煩趣猶止于中
聲孔子嘗欲放鄭聲豈有刪詩示萬世乃收鄭聲以備
六藝乎此說不爲無理而文公則謂鄭風衛風若干篇
卽是鄭衛大雅小雅若干篇卽是雅二南正風房中之
樂也二雅之正朝廷之樂也商周之頌宗廟之樂也變

雅無施于事變特里巷之歌謠耳必曰三百篇皆祭祀
朝聘之所用則未知桑中溱洧之屬當以薦何等之鬼
神接何等之賓客耶此二說者內翰尙書王公應麟與
予一商略之矣作詩不皆無邪文公糾成公之說也因
是遂辨雅鄭二字而及于三百篇或用爲樂或不用爲
樂三節不同所以謂之未了公案學者不可不細考也

王魯齋詩
可言集考

道一而已而物有萬古聖賢之學不專在語言文字日
月星辰與天爲體運而不已山川草木與地爲體生而

不窮言語文字與聖賢爲體傳而不朽體物也所以用之者道也道不離物易究休咎書紀治亂詩美刺春秋褒貶三禮辨上下論專言仁孟兼言義皆以語言文字與道爲體其妙用所在一而已一者何道是也然則何道也天地之心耳此之謂道而以其道用乎日月星辰山川草木之物故曰道不離物聖賢之心欲使千萬世之人爲善不爲惡以復其有善無惡之性則不容不著之書此語言文字所以爲斯道有形之體而無形之道所以用乎有形之體而寓于言語文字之中也顧可忽

諸應子翱經傳蒙求序

漢董唐韓明道正義之策原道原性之篇超越諸子斯教矣斯學矣然未也宋儒歐陽文忠公文章第一范文正公事業第一司馬文正公踐履第一然亦未也王半山申韓而佛老者也蘇長公儀秦而佛老者也黃與陳李杜而佛老者也其人品非不高而道則皆未也然則人心之天可泯乎世無復孔子矣豈無復孟子乎孔孟之不傳有人焉其求諸極圖通書定性傳易正蒙經世之作乎雖河洛門人間有雜于禪者幸楊龜山得之程

而延平傳朱文公五峯傳張宣公幸呂滎陽得之程而
家學傳小東萊呂成公宣公成公年不及艾文公雖罹
黨禍其所著書與周元公以來諸書並存植綱扶常之
教率性立命之學萬世有賴黃勉齋蔡元定羽翼其教
斯學也李公晦年譜陳安卿字義發明其教斯學也真
文忠公集及大學衍義讀書記類聚言仁學也魏文靖
公集及九經要義十七家周易集義學也捨是而他近
世解省經賦非學也宏博制詔非學也趙雪秀劉潛夫
之詩歌非學也陳同父葉正則之議論非學也陳祥道

鄭漁仲之類聚非學也晏叔原秦少游辛幼安姜堯
章之長短句非學也張子韶以至二陸楊袁直入頓悟
祖磨宗能非學也草木蟲魚訓詁非學也江河鳩鵲形
聲非學也塗亞爲戲軋苗爲工震寒札洪爲癖皆非學
也清惇紹熙豐京卞誤宣靖秦檜和議侂冑開邊彌遠
廢立嵩之出師似道公田關弊欺孤弱寡趨而和之參
樞侍從皆不學之小人也嗚呼人心其果不古乎穴槐
君臣銜蘆兄弟人而反不如物乎

送白廷玉常州教授序

力學衰猶進治生晚不讎操心元自定忤俗果何由塗

抹餘干紙浮沈等一漚忍窮兼忍辱失笑未包羞

力學

玩透羲爻未畫前今時天卽古時天回空其庶亦其庶
軻死不傳焉不傳積憤淫傷詩未削暗籌微婉史誰編
繼周百世民彝在豈爲興亡有變遷

有感

附錄

其自述曰八叔父豫教以至於成

又曰不專爲科舉之學學性理自眞西山讀書記入學
典故自呂東萊大事記入學五七自張苑邱入學四六
自周益公入而時文之進自州教授天台諸葛公泰始